

## Kadasi n bo YAKOBO akerε i ni

<sup>1</sup> Mini Yakobo bo m ti Nyεmε ni ya Mibiε Yesu Kristo dεε akoo ni, m bisa Kristo jamam n kerε dɔŋgu, berε bo ba sandi abara aye durunya n kerε nu ni.

*Yaradayo ni alecira jɔrε*

<sup>2</sup> M ninbaam, nzen gberegbere be tu am, am ma am ahore jɔ.

<sup>3</sup> Dama am si ka am yarada bo am ayo Nyεmε n dεε ti, ye nyini gberegbere n tu am a, na am mindi ŋuuri i awieeri, am koro mindi ŋu gberegbere bo bu tara nyini n mmoo awieeri.

<sup>4</sup> Am ma am mindi n sun am nu, adena am woowa kerε ti kabo Nyεmε koro ka i ti ni na má pui kpie am su.

<sup>5</sup> Ama, nzen alecira akpie am nu be su, i ti ye ni ka i mi sere i Nyεmε dɔ, yiri bo i ce sɔnɔ kerε aceeri ni i kunnu kun ni, na i wura má be nyinse ka i mi asere i n dεε ti. Nyini ti, nzen be sere Nyεmε, yiri má i mi alecira n a.

<sup>6</sup> Ama, nzen be sere Nyεmε, i ti ye ni ka i mi yo yarada ka deke bo i sere i ni, Nyεmε má i wɔ, na má i mi yo sika, dama sɔnɔ kerε bo i yo sika, i ti ka nzue bo aɲuma bo i kɔ i sin ba i nyunu wɔ.

<sup>7-8</sup> Nyini sɔnɔ n bo i yo sika sɔ ni, i sunsunni ti nnyɔ nnyɔ ɔ, fa kɔ Nyεmε dɔ, i si má i jinaabiri. Má i mi n sunsun ka i nya pui fite Mibiε n dɔ.

*Fotu fa kɔ Kristo jama n yaarifɔm ni nenɛgefɔm do*

<sup>9</sup> Tɔ, ya niwa bo i ti yaarifɔ, na Nyɛmɛ awura i kpiri, i ti ye ni ka i mi ma i ahore da.

<sup>10</sup> Na ya niwa bo i ti nenɛgefɔ gusu, na Nyɛmɛ ayo i kaan, i ti ye ni ka i mi ma i ahore da. Dama i cɛ má na i ni i nenɛge n kɛrɛ bá wo má bɛrɛ, kabo wura pum cɛ má, na i ni i nyumi n kɛrɛ kpɔnkpɔn barasu ni.

<sup>11</sup> I ti sɔ sɔ, kabo wiɛ ba bi, na i kekɛrɛ n bo kpɔnkpɔn wura pum na i wu, na i nyumi wie ni. Kabo nenɛgefɔ n gusu ni i nenɛge n ti lɛɛ. Sangga bo i nyunu aba aboro i juma su ni, i ni i nenɛge n kɛrɛ bá wo má bɛrɛ kun.

*Fotu fa kɔ sangga bo am wo gbɛrɛgbɛrɛ nu ni*

<sup>12</sup> Terefiɛ wo sɔnɔ kɛrɛ bo gbɛrɛgbɛrɛ tu i, na i mi saaki má i nɔɔ n do. Nyini sɔnɔ n koro mindi ɲuuri nyini gbɛrɛgbɛrɛ n awieeri, i nyá ɲɔɔ Nyɛmɛ do, nyini la aceeri n bo i yo seeri ka i fá ma bɛrɛ bo bu koro i ni.

<sup>13</sup> Nzen gbɛrɛgbɛrɛ n sɔ n atu be na i ma i wura satie nu, má i mi se ka, “Nyɛmɛ ayo m ye m wura satie nu a.” Dama pui koro yo má Nyɛmɛ na i wura satie nu, na i gusu yo má be na i mi wura satie nu.

<sup>14</sup> Ama, deke bo i ma sɔnɔ wura satie nu n la i mi ni i tii dɛɛ konvikiya a, nyini ma i cin dodo satieyo a,

<sup>15</sup> na nyini konvikiya n nya cin i wura satie nu na i mi yo satie be, na nyini satieyo n nya ba bi wieeri, i fa yiwee ba a.

<sup>16</sup> M ninbaa koroowam, má am daka am ɲu.

<sup>17</sup> Aceeri kere bo i ti kpa na i ti kabo Nyeme koro ka i ti ni, i kere fite angoro ya Si Nyeme do o, yiri yiiri deke n kere bo i ta angoro n a. I wo ti i wo wo, na i ma ma awosin yo ma na i kaaki deke be.

<sup>18</sup> I deɛ koroyanu, na wo fa i noanie n bo i ti nahore n ama ya, ye ya yo i nbaam. I yoori so o, adena ya yo deke n kere bo wo yi bu n tii.

*Am de Nyeme noanie n na am yo kabo i kere ni*

<sup>19</sup> M ninbaa koroowam, i ti ye ni ka am ti ahin sereya n bu, ka, sono kere so i sui ndende na i ti, ma i mi koro nde jojo, ma i kaaki fa yaa ndende.

<sup>20</sup> Dama yaa kere ma sono na i yo sa bo i ko atin su Nyeme do.

<sup>21</sup> Nyini ti, am yaki sa ngbɛɛnngbɛɛn, ni satie kere yo. Am yo am nu kaan fa ma Nyeme, na am de i noanie n bo wo fa awura am ahorembaa su ni. Dama nyini noanie ni koro de am tii ji a.

<sup>22</sup> Am yo kabo Nyeme noanie n kere ni. Ma am dadaka am nu ka am ati i na am yo ma kabo i kere ni.

<sup>23</sup> Dama nzen be tiiri noanie n na i yo ma kabo i kere ni, i mi ti ka sono bo i fa niɛnu nie, na i nu i nu wo,

<sup>24</sup> ama, na i nya faari niɛnu n seeri, na i ko wieeri, a nu ka i wara afi kabo i nyunuawa ti barasu.

<sup>25</sup> Ama, sono kere gusu bo i fiitiiri Nyeme noanie kpamaawa n nu, noanie kpamaawa n bo i ti kabo Nyeme koro ka i ti n na i ma minem nyaari bu tii ni, na nzen i mi boro i nyi su noanie n su, na i mi ti ma sono bo i ti noanie n na i

wara aƙi i, ama, na i ti soƙo bo i yo kabo noƙanƙe n kere ka i yo ni, i mi yiri, Nyeme yó i kisi fa kó i sayoowa kere nu.

<sup>26</sup> Sasu bekun, soƙo kere bo i ɗa i su Nyeme atin su, na i koro tara má i noo, i mi daka i ɗu wo lee, na i nyemesu atin n ti ngbeen wo.

<sup>27</sup> Nyemesu atin bo be su i su n na i la má gela be ya Si Nyeme do n la ahin, ka, i mi nie ayikam ni nkunafom su, bere bo bu di yaari ni, na i mi kaaki tara i ɗu na má durunya n nufom ma i yo fin be Nyeme do o.

## 2

### *Fotu fa ko tantambunu*

<sup>1</sup> M ninbaam, kabo am yo Yesu Kristo yarada ni, yiri bo i ti ya Mibie Jirimafó ni, má am fa tantambunu ni am beɗu.

<sup>2</sup> Ma m fa i ka, nzen mine nnyo nbem ba wuraari am tientienbunoo soo n nu, na kun wura sutura kpakpa ni sika ngaa, na nyinɗa n ti yaarifó na i wura sutura titiwa,

<sup>3</sup> na nzen am nu kun se bo i wura sutura kpakpa n ka, "Jande, ba tana ahin tanaabiri nyunyumi n su," na i nya se yaarifó n ka, "Woro, ka jina do, nzen má nyini, ba tana m jaa bu fen,"

<sup>4</sup> nyini kere ka am sufa tantambunu atin lee, na am sunsunni tie ma am sufa kpakpaakinu ba lee, má so?

<sup>5</sup> M ninbaa koroowam, am ti fen. Má Nyeme yiiri yaarifom bo bu wo durunya n nu n ka bu ti ajekefom i do, bu yarada n dee ti a, na bu nya

femeya n bo wo se ka i fa ma minem bo bu koro i n a, nzen se?

<sup>6</sup> Ama, ambere bu yaarifom ngbeen wo. Nmam kere am wahara n a? Nmam kaaki cin am ko jore diibirim n a? Ma nengefom n a?

<sup>7</sup> Ma bere jowo wura duma n bo i la anyunuyi ni ngasi nu n a? Yiri ye Nyeme afa ama am na i kere ka am ti i deem ni.

<sup>8</sup> Ba kere i Nyeme Jore Kadasi n nu ka, "Koro u bengu kabo a koro u nu ni." Nyeme femeya n nu noanie kpamaawa bambaka n lee. Nzen am yo so, nyini ti kpa a.

<sup>9</sup> Ama, nzen am laari tantambunu, am ayo satie, na Nyeme noanie kpamaawa n kere ka am ti ketemafom wo lee.

<sup>10</sup> Woro kere bo a suuri Nyeme noanie kpamaawa n kere su, ama, na a saakiiri i kun n kpein mmoo, a saaki noanie kpamaawa n kere lee.

<sup>11</sup> Nyeme bo wo se ka, "Ma a kpini u bengu yi" ni, yiri akaaki ase ka, "Ma a kun sono" n a. Ama, nzen haari a kpini ma u bengu yi, ye a kuunri sono, a yo ketemafom fa ko noanie kpamaawa n su lee.

<sup>12</sup> Am ma am jowowa ni am sayoowa kere ka am ti minem bo Nyeme ba fa i noanie kpamaawa ni fa di am jore a, nyini noanie kpamaawa n bo i ma minem nya bu tii ni.

<sup>13</sup> Dama joredi een, minem bo bu si ma bu bengum anunfo ni, Nyeme si ma bere mmoo anunfo. Ama, anunfo sifom ni, bere di nasara, joredi een ni.

*Fotu fa ko yarada ni i sayoowa*

14 M ninbaam, nzen sɔnɔ ɲa i yo Nyeme yarada, na i sayoowa kere má ka i la yarada, nyini yarada ni kóro de i tii ji, nzen se? Ai, nyini ti ɲgbɛɛn wɔ lɛɛ.

15 Ma m fa i ka, nzen am ninbaa Kristo jama nbem wo bere bo bu la má diire, na bu la má sutura,

16 na nzen am nu kun seeri i ka, “Kɔ ni ahoreda. Nyeme ma u na a di, na i ma a nya sutura.” Nzen a seeri sɔ, na a ma má i mi koroowa ni, i kpa la bɔnɔ?

17 Nyini ti, nzen a la yarada n ɲgumi, na u sayoowa kere má ka a la yarada, i ti yarada ɲgbɛɛn wɔ lɛɛ.

18 Be koro se ka, “Ahin sɔnɔ n yiri yo Nyeme yarada wɔ, ama, ahin n yiri yo sakpa a.” Tɔ, ye sɔnɔ yo se kere ka i yo Nyeme yarada, bo i yo má sakpa a? Mini yo sakpa a, nyini kere ka m yo Nyeme yarada.

19 A ɲa a yo yarada ka Nyeme ɲgumi wo bere a. Nfan. Haari ajinim mmɔɔ si i sɔ ɔ, na bu ɲunie subobo bu ni sere.

20 Wɔrɔ sinnzin ɲgbɛɛn ni, a koro ka m kere u ka yarada yoowa bo i kere má sakpa n ti yarada ɲgbɛɛn wɔ, nzen se?

21 I yo se ye Nyeme deeru ya na Abraham ka i yo sa bo i kɔ atin su i dɔ a? Abraham sayoowa n dɛɛ ti ye Nyeme deeru i sɔ a, dama Abraham yo faari i wa Izaki fa seeri Mikun n yoowa yoobiri n ka i fa i yo yoowa ma Nyeme ni.

22 A ɲu má i? I yarada yoowa fa sanɲa ni i sakpa yoowa kere yoori kun wɔ. Na i sayoowa n akere ka i yarada n ti kabo Nyeme koro ka i ti

n wɔ.

<sup>23</sup> Sɔ ye deke n bo bu kerɛeri i Nyɛmɛ Jɔrɛ Kadasi n nu n ayo yiiwa a, ka, “Abraham yoori Nyɛmɛ yarada n dɛɛ ti, na Nyɛmɛ ade i ka i yo sa bo i kɔ atin su i dɔ.” Nyini ti, ye bu fereeri i ka Nyɛmɛ danfo n a.

<sup>24</sup> Tɔ, m ɲa am aɲu i e, ka sɔnɔ sayoowa ma Nyɛmɛ de i ka i yo sa bo i kɔ atin su i dɔ a, má ka i mi yarada ɲgumi ti.

<sup>25</sup> I ti sɔ ɔ lɛɛ, fa kɔ bara sakara be bo bu fere i ka Rahabu n dɔ. Dama dawa sanɲa, yiri yo bukaari Yisarelifɔm dɛɛ kɔrɛsiyifɔm n a, na wɔ kere bu atin na ba foro bu kpɔfɔm saa nu. Nyini sayoowa n dɛɛ ti, na Nyɛmɛ ade i ka i yo sa bo i kɔ atin su i dɔ ɔ.

<sup>26</sup> Tɔ, kabo ɲumi awo má aɲuniɛmbaa n nu na i ti fuin ni, sɔ ye i ti a, nzen a la yarada na u sayoowa kere má ka a la yarada, yarada ɲgbɛɛn lɛɛ.

### 3

#### *Fɔtu fa kɔ kabo ya bita ya taferema*

<sup>1</sup> M ninbaam, má am dɔɲgu yo am ɲu kerefɔm. Dama am si ka yere bo ya ti kerefɔm ni, ya jɔrɛ diiwa bá yo kekereke agaya a.

<sup>2</sup> Ya kere ba yo, ya yo sam bo bu kɔ má atin su wɔ. Ama, nzen sɔnɔ kere bo i jɔjɔowa kere kɔ atin su, i mi woowa n ayo kabo Nyɛmɛ koro ka i yo n wɔ lɛɛ. I kere ka i mi n la tarabuɲu sa kere nu lɛɛ.

<sup>3</sup> Am ma ya niɛ kpɔɲɔ. Ya fa karafi wura kpɔɲɔm nɔɔ ɔ, na ya kunma bu fanɲa na bu yo deke kere bo ya koro ka bu yo i ni.

<sup>4</sup> Am ma ya niε lee bambaka gusu, i ni i bambaka n kere ni, haari nzen anjuma bambaka subo i ko deke be, lee kanfo n koro fa napoku baka n bo i ti kaan ni lee ni, na i kan i ko deke kere bo i koro.

<sup>5</sup> I ti so lee ni taferema n gusu, i ni bo i ti kaan anjuniembaa n nu n kere ni, i koro saaki deke dongu.

Nie kabo sin ti barasu a, haari i ti kaan se, i koro je boo bambaka.

<sup>6</sup> Taferema n ti ka sin wo lee. Bekun, ya nuniembaa n nu, i kaaki ti ka satiem bo ba yi durunya n nu n wo, i satie n sa anjuniembaa n kere wo. I yo juma ka sin wo, na i saaki sono nuniembaa n fite ceen n bo bu wuuri i n fa ko ju haari i yiwee ceen. Yiko bo taferema n la i na i yo so n fite ceema sin n nu wo.

<sup>7</sup> Adamande kunma deke n kere fanga, i ajannam o, i lanjketefom o, i cinbukunnusufom o, ni jombaam o. Na wo koro ata bu kere.

<sup>8</sup> Ama, taferema yiri, sono be nya koro kunma ma i fanga. I ti deke tie wo, bo be koro tara ma i. I ti ka wo yi ni bore bo i kun wo.

<sup>9</sup> Ya fa yiri fa kansi Micera n bo i ti ya Si n a. Na ya kaaki fa yiri saaki minem bo Nyeme ayi bu ka bu ferema ni yiri n a.

<sup>10</sup> Nyini anoo kun n ye kansi ni saaki fite nu a. M ninbaam, wo yo ma daka ka i ti so.

<sup>11</sup> Bura kun koro tie nzue kpa, ni nzue tie, nzen se? Ai, i koro yo ma.

<sup>12</sup> M ninbaam, am si ka damba baka koro su ma ngunmbaa. Cumi baka gusu koro su ma damba. I ti so o lee, bura bo i nzue ti lalaraki,



i koro tie má nzue bo i yo fie.

*Fotu fa kɔ alecira bo i fite Nyeme do ni*

<sup>13</sup> Nma wo am nu bo i la alecira ni si a? I ti ye ni ka i mi kere ka i ti so ɔ, fa kɔ i woowa kpa su, na i yo sakpa, na i wo benle, nyini kere ka i la alecira.

<sup>14</sup> Ama, nzen am susi kore ahorembaa su, na am suyo wi, na am bita anyii sunsunni, má am bita fo ka am la alecira, na má am bu kore jaraki nahore n so.

<sup>15</sup> Nyini alecira n so fite má Nyeme do, ama, i fite durunya n nu fen wo, i nati má Nyeme atin su, i ti Sitana dee wo.

<sup>16</sup> Deke bo koresi, ni anyii wo, kpakpaakinu ni satie yoowa barasu kere wo do ɔ.

<sup>17</sup> Ama, sonɔ bo i la alecira n bo i fite Nyeme do n la ka, i woowa ti casi. Bo i to su n la ka, i koro tanalaifie, na i la wo benle, na i de fotu, na i si anunfo agaya, na i yo sakpa beberebe, na i la má tantambunu, na i kaaki la má burukɔnu.

<sup>18</sup> Tanalaiefom bo bu yo tanalaifie juma ni, bu ŋkato n la sam bo bu kɔ atin su Nyeme do n wo.

## 4

*Fotu fa kɔ kabo ya da ya ŋu asienɔgu fa ma Nyeme ni*

<sup>1</sup> Nzu ti ma am di aluwa, na am suse akuruwa am ŋuŋu nu a? I fite ka am sunsunni ti tie, fa kɔ am ahorembaa koroowa beberebe n bo i wo am ŋuniembaa nu, na i kpie am daafiri n dee ti a, má so?

<sup>2</sup> Am koro deke nbem, na am nya má bu n ti, ye am koro ka am kun am bengum n a. Am konviki

wura minem nenje nu, na am nya má i n ti, ye am se akuruwam, na am di aluwa n a. Am sere má Nyeme n dæ ti, ye am nya má am koroowa n a.

<sup>3</sup> Deke bo i ti na am sere Nyeme na am nya má i n la ka, am sere ni sunsunni tie wɔ. Am sere dekem ka am fa yo am kunnu koroowa a.

<sup>4</sup> Ambere bo am su má Nyeme ni, am si má ka sɔnɔ kere bo i koro durunya n nu nenjem agaya, ti Nyeme kpɔfɔ ɔ, nzen se? Nyini ti, sɔnɔ bo i fa i ahorembaa se durunya n nu nenjem su, i mi ti Nyeme kpɔfɔ ɔ læ.

<sup>5</sup> Má am sunsun ka deke bo ba kere i Nyeme Jɔre Kadasi n nu n ti ngbɛɛn wɔ, ka, “Sɔnɔ kere bo i fa i awiewie n bo Nyeme afa ama i n suuri deke be sin Nyeme ŋu, Nyeme si i kɔre agaya.”

<sup>6</sup> Ama, ahɔrɔma n bo Nyeme afa ama ya n sunnu. Nyini ti, ye ba kere i Nyeme Jɔre Kadasi n nu ka,

“Nyeme kete kpirikorofɔm wɔ,

ama, na i fa i ahɔrɔma n ma tarakam.”

<sup>7</sup> Nyini ti, am fa am ŋu ma Nyeme. Am kete Sitana, na i ŋmáti yaki am.

<sup>8</sup> Am cin dodo Nyeme, na i gusu cín dodo am. Ambere satieyofɔm, am yi am saa fite satie nu. Ambere anɔɔ nnyɔ nnyɔfɔm, am yo am ahorembaa casi.

<sup>9</sup> Am satie dæ ti, am ma am ahore saaki, na am sun. Am fa am siri fa kaaki sun, na am fa am ahorejɔ fa kaaki ahoresaaki.

<sup>10</sup> Am da am ŋu asienɔgu ma Nyeme, na yiri bá wura am kpiri.

*Fɔtu fa kɔ kabo má ya jaraki ya benɔum ni*

<sup>11</sup> M ninbaam, má am jòjò tié ma am benḡu. Wòrò bo a jòjò tié ma u lamòkò, wara a jaraki i, a jòjò tié afa akò Nyemé nòanié kpamaawa n su ajaraki i lée. Nzen a nya yoori sò, a nya ti má sòsò bo i de Nyemé nòanié kpamaawa n lée, ama, a yo u ḡu ka jòredifò lée.

<sup>12</sup> Nyemé ḡgumi ti i nòanié n kpamafo a, na yiri ḡgumi kaaki ti i jòredifò a, yiri bo i koro de minem tii ji na i kaaki koro ma bu ka ḡgbèen ni. Wòrò la ḡma na a jaraki u benḡu a?

### *Fòtu fa kò yanfòya atin su*

<sup>13</sup> Am ti fèn, ambere bo am se ka, “Nyuma, wara ahunma, ya kó ahin mié n su, na ya kó yo afo kun dò, na ya yó juma, na ya nyá ḡwaa beberebe ni.”

<sup>14</sup> Ambere, haari am si má sa bo i bá yo am ahunma mmòò. Am ni am ḡgòò ti ka sè? Am ti ka bòrè wò, bo i tò na i cè má, na wié ba tié, a ḡu ka wò kpònkpòn ni.

<sup>15</sup> Deke bo i ti ye ni ka am se n la ka, “Nzen Nyemé diiri su, ya wó bèrè, na ya yó ahin ni ahin.”

<sup>16</sup> Ama, kabo i ti ni, ambere koro kpiri wò, na am sufò. Nyini yanfòya sò n kere ti má kpa.

<sup>17</sup> Tò, nyini ti, sòsò kere bo i si sakpa bo i yo i, na i yo má i, i mi yo satie wò lée.

## 5

### *Fòtu fa kò nenḡefòm dò*

<sup>1</sup> Ambere nenḡefòm, am ti fèn. Sa ḡgbèen-ḡgbèenm bo bu bá tu am n dèè ti, am sun na am subo awie.

<sup>2</sup> Am ajɛkɛ n kɛrɛ susaaki, na nvɔrɛm sumuka am suturam n kɛrɛ.

<sup>3</sup> Am sika ni am jɛtɛ kɛrɛ suwura ɲgambulaari, na bu ɲgambulaari wuraawa ni bá ma Nyɛmɛ jaraki am, na i káaki ba yara am ka sin, am ɲuniɛmbaa nu. Am atien ajɛkɛ nɔɔ afa ase fa kɔ durunya n awieeri wɔ lɛɛ.

<sup>4</sup> Sasu bekun, am akete ka am tɔ má jumayo-fɔm ɲkatɔ, bɛrɛ bo bu tambu am fiesu nɛɲge mbaa ni. Am ti kabo bu kan am ndiɛ a, bu awie bo n kɛrɛ ato Micera Yikofɔ n sui nu.

<sup>5</sup> Kabo am wo durunya n nu fɛn ni, am adi fiɛ, na am ayo am kunnu koroowa. Am adi ayo ɲgbɲgbiri ka toora dɔdɔɔrifɔm bo bu sukɔ ka bu kpɛ bu kɔm ni.

<sup>6</sup> Minɛm bo bu la má ɲgasi be ni, bɛrɛ n ye am ama ba di bu jɔrɛ acin bu sui akun bu a. Bu kete má am wɔ.

*Awieeri su dɛɛ fɔtu jɔrɛm ni*

<sup>7</sup> Nyini ti, m ninbaam, am yo sawɔrɛ ɲminda fa kɔ cɛɛn n bo Mibiɛ ni bá ni. Am niɛ kabo dɔdɔɔrifɔ yo sawɔrɛ ɲminda, haari kabo bu fiesu diire bá yo kpakpa barasu. I yo sawɔrɛ ɲminda kpanyini nzue kɔ tu takoku wɔ.

<sup>8</sup> Am gusu yo sawɔrɛ. Am ma am ahore si, dama Mibiɛ n ba sanɲa n adodo.

<sup>9</sup> M ninbaam, má am wo waraki su, sukan am bɛɲgu ndiɛ, adena má Nyɛmɛ bá di am jɔrɛ. Am ti fɛn, yiri Jɔrɛdifo n lɛɛ, yiri jina anɔ n nu n a.

<sup>10</sup> M ninbaam, am ma ya tɛɲge su, fa kɔ Nyɛmɛ nɔanɛ kanfɔm n bo bu yo jɔjɔɔri Micera n duma n nu ni. Am su bu jaa yiiwa su, kabo bu yo yoori sawɔrɛ mindi diiri wahara ni.

<sup>11</sup> Nahore, minem bo sa tu bu, na bu la mindi ko ŋu i awieeri ni, bere ye ya fere bu ka terefie-fom a. Am tiiri kabo sonɔ be bo bu fere i ka Yobo n yo laari mindi barasu, fa ko ni wahara n kere bo i yo diiri i ni. Am si kabo kasin na Micera n abuka i ni. Dama Micera n si aɲunfo na i la koro agaya.

<sup>12</sup> M ninbaam, jore bo i buka i kere su n la ka, ma am tan deke be ndie fieo. Ma am se ka am tan asienɲu, wara am tan aɲgoro. Nzen u jɔjɔɔwa n bu la ka en, am se ka, "En." Na nzen u jɔjɔɔwa n bu la ka ai, am se ka, "Ai." Adena, ma Nyeme di am jore na i yo am nɲben.

<sup>13</sup> Nzen be wo am nu bo sa be atu i, i ti ye ni ka i mi sere Nyeme. Na nzen be wo am nu bo i ahore aɲɔ, i ti ye ni ka i mi di jue kansi Nyeme.

<sup>14</sup> Nzen be wo am nu bo i la ma laifie, i ti ye ni ka i mi fere Kristo jama nkpienkpienm na bu ba sere Nyeme ma i, na bu nunuka i nɲuin, Mibie n duma n nu.

<sup>15</sup> Nyini nyemesere n bo bu sere i ni yarada ni, i ma tukpakifo n nya laifie, na Mibie ni ma i yasu. Na nzen haari wo yo satie mmɔɔ, Nyeme fa i satie n ce.

<sup>16</sup> Nyini dee ti, am kan am satie bo am ayo i kere am beɲgu, na am sere Nyeme ma am beɲgu, adena am nya laifie. Sonɔ bo i yo sa bo i ko atin su Nyeme do ni, i nyemesere la fanɲa, na i yo juma nahore su.

<sup>17</sup> Nyeme noanie kanfo n bo bu fere i ka Eliya ni, i yo tiiri adamande ka yere wo, na wo sere Nyeme ni anyumboro su, ka, ma nzue to, na nzue n ato ma asien n su afo nsan ni sara nsen.

<sup>18</sup> Na wɔ kaaki asere Nyɛmɛ, ka, i ma nzue n tɔ, na wɔ tɔ, na asien n diire mbaa kɛrɛ akaaki ayo.

<sup>19</sup> M ninbaam, nzen am nu kun miniiri nahɔrɛ atin ni, na am nu kun be faari i kpieeri i nyi baari atin n su,

<sup>20</sup> i ti ye ni ka i mi n si nu ka, sɔnɔ kɛrɛ bo i yiiri satieyofɔ fiteeri i satie atin n su, i mi de nyini sɔnɔ n tii fite yiwee nu, na i ma Nyɛmɛ fa i mi satie beberebe n fa ce i.

**ΝΥΣΜΕ ΙΟΡΕ ΚΑΔΑΣΙ**  
**The New Testament in Anufo (Chokosi)**

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2025-05-01

---

PDF generated using Haiola and XeLaTeX on 30 Apr 2025 from source  
files dated 1 May 2025

fe36d0e6-2a60-5e15-8d1c-8bf275389598